


HAIEN ORDEZKARIEK DELEGAZIO BAT OSATUKO DUTE GOBERNU BERRIAREN IKUSTERA JOATEKO

Euroituna onartzeko beharra aldarrikatu dute eskualdeek

■ Zazpigarren aldikotz, Frantziako eskualdeetako ordezkariak bildu dira Nimesen eremu urriko hizkuntzen egoeraz eztabaidatzeko. Elkarlana abiatuko dute gobernu berriak lehenbailehen izenpe dezan hizkuntza gutxituon aldeko deklarazioa, Euroituna.

Lutxi Fourcade / Baiona



Eskualdeen arteko V. Biltzarra egin zen Uztaritzen duela bi urte.

LUTXI FOURCADE

DUELA zazpi urte, Britainiako Kultur Kontseiluak gonbidatu zituen kultura berezia daukaten eskualde edo kontseilu nagusietako ordezkariak, egoera kulturalaz eztabaidatzeko Roazhonen (Rennes). Hautetsiez gain, administrazioko ordezkariak eta elkarte kulturalak ere parte hartu zuten elkarretaratzean. Geroztik, antzeko biltzar bat egiten dute eskualde desberdin batean, eta eskualdeen egoera orokorra nahiz gai bereziak aipatzen dituzte estrategia komuna eratzeko.

Eskualdeen Arteko VII. Biltzarra iragan da joan den ostegun-ostiraletan Nimesen (Okzitania). Britainia, Korsika, Okzitania, Alsazia, Katalunia eta Euskal Herriko ordezkariak biltzeaz gain, lehen aldikotz Guadalupe, Martinika eta Reunioneko kideak etorri ziren itsasoz harateko berriak emateko. Euskal Herriko ordezkariak dagokionez, Jean Aintzbehere Sarako auzapezak, Mixel Oronos Euskal Konfederazioko lehendakariak, Erramun Baxok eta Txomin Hegi EKEko zuzendariak eta lehendakariak osatu zuten.

Aktualitateko eta oinarritzeko mintzagaiak eztabaidatzen ohi dira topaketetan. Erramun Baxok adierazi dio EGUNKARIARI luzaz aipatu zutela Estatuko Kontseiluaren abisu ezkorra Euroituna izenpetzeko. EKEren gobernuak goi mailan jotzeko nahikariarekin bat egin zuten bildutako

ordezkariak eta mozio bat bozkatu dute delegazio bat osatzeko gobernu berriaren ikustera joateko. Euroituna izenpetzea galdegingo dute, eta «ezin bada, Konstituzioa alda dezatela herri hizkuntzek behar duten legea izateko». Estatuko Kontseiluaren abisua salatzeke, argumentazio sakona prestatu dute legegariak, eta batez ere Paueko Thierry Michalonen laguntzari esker.

Aktualitateko gaiarekin jarraitzeko, gobernu berriaren alde

onak eta txarrak neurtu zituzten Nimesen. «Jende irekiak badira ere, jakobino amorratuak bildu ditu Jospinek eta geroak erranen du zer norabide hartuko duten». Zernahi gisaz, lehendakaria eta lehen ministroa ikusteaz gain, Catherine Trautman Kultura ministro berriarekin biltzeko asmoa azaldu zuten biltzarran, baita Dominique Voynet lurralde antolakuntza ministroarekin ere.

Topaketan beste gai nagusia turismoa izan da. «Guretzat gai

minbera da, badakigulako ekonomia zati handi bat dela», azaldu du Baxokek, baina gai horrek bazuen garrantzi handia Okzitaniako edo Britainiako ordezkariarentzat. Turismoa eta kulturgintza bereizi beharra aldarrikatu zuten topaketetan, bi bide ezberdin direla eta. «Nahiz eta gurutzatzen diren udan, turismo kulturalaren kontzeptua argitzeko behar gorria ikusi dugu eta hausnarketa abiatuko dugu». X

Garonoako zentral nuklearra ixteko eskatuko dute Miranda de Ebron

■ Gaur arratsaldeko 13:00etan hasiko den manifestazioarekin bat egin dute HBk eta Aedenatek

Erredakzioa / Donostia

GAROÑAKO (Burgos) zentral nuklearraren aurka manifestazioa egingo da gaur Miranda de Ebron, Garonoaren kontrako Koordinakundeak deituta eta hilaren 15ean, Eguzkiaren Europaren Eguna zela-eta, abiatutako ekintza egitarauaren barruan. Energia berrigarriak dituzten abantaila eta potentzialitatez ohartarazi nahi izaten da egun horretan.

Arratsaldeko ordu batean emango diote hasiera manifestazioari. Protestaldirekin bat egin dute Herri Batasunak eta Aedenatek, herenegun eta atzo zabalduak prentsa oharren bidez.

HBren hitzetan, Garonoako zentral nuklearra ixtea «lehen-tasun handiko behar soziala» da, eta gainera «guztiz gauzagarria, etorkizuneko beharrei aurre egingo dien plan energetikoa oinarritzat hartuta».

Elkarte ekologistak azpimarratu duenez, Espainian den zentralik zaharrenak «korrosio arazoak ditu ontziaren egiturari», eta horrezaz gain, «korrosioari aurre egiteko urte hasieran egingako lanak txapuz bat baino ez dira, segurtasun arazoak inondik inora konpontzen ez dituztenak».

60ko hamarkadan eraikitakoa da Garonoako zentral nuklearra, suteen aurkako babes sistemetan arazo larriak izan ditu urteotan eta «ez ditu bere diseinuan aplikatu Txernobilen edo beste hainbat zentraletan izandako ezbeharretatik ateratako ikasgaiak». X

Kontseilu Nagusiak baimendu du haurtzaindegia

■ François Bayrouk akordioa izenpetu zuen ostiraletan

Lutxi Fourcade / Miarritze

HILABEETAKO borrokaren ondotik, François Bayrou Kontseilu Nagusiko lehendakariak izenpetu du Miarritzen euskarazko haurtzaindegia irekitzeko baimena joan den ostiral arratsaldean. Baimen hori baizik ez zuen eskas Uda Leku elkarteak haurtzaindegia irekitzeko eta arazo administratiboak bakarrik izanen ditu orain argitzeko. Besteak beste, Miarritzeko Udalak beharko du gune egokia proposatu elkarteari eta egitura administratibo berria sortu beharko da haurtzaindegia irekitzeko.

Uda Leku elkarteak euskarazko astiriak proposatzen ditu

aspaldi Ipar Euskal Herrian. Alabaina, euskarazko haurtzaindegia irekitzeko proiektua gogoetatzeko hasi zuen gurasoen beharari ihardesteko. Proiektu pedagogikoa penintsula osoan, elkarteak langile taldea osatu zuen eta haur kopurua neurtu. Azken herriko hauteskunderen ondotik, lankidetzaren proposamen interesgarria eskuratu zuen Miarritzeko Udaletik. Herriko Etxeak hiriko haurtzaindegiko 12 toki proposatu zizkion elkarteari, baita egoitza egokia ere. Bestalde, Administrazioak eman zizkion elkarteari behar zituen baimen guztiak proiektua gauzatzeko.

Alabaina, Kontseilu Nagusiaren bosgarren batzordeak ukatu



Gurasoek joan den ostegunean haurtzaindegia irekitzeko egin zuten protestaldia BOB EDME

zuen baimena ematea. Arazo politikoa aipatu zuten Uda Leku elkarteak arduradunek, haurren harrera euskaraz hutsez egingo baita. Egoera salatzeke, Uda

Lekuko kideak eta gurasoek protestaldia egin zuten joan den asteazkenean Baionan. Badirudi ekimenak bere fruituak ekarri dituela, eta Bayrouren baimena-

ri esker ez da gehiago oztoporik izanen euskarazko sare osoa izateko Ohakoak deitu haurtzaindegitik unibertsitateraino Iparraldean.